

Hauptversammlung vom Jodlerklub Heimelig Baar, 5. Februar 2021 (brieflich)

Jahresbericht vo de Chorleiteri

Liebi Jodelkameradinne und -kamerade

Au s'2020 wird also es beläbts, freudigs Heimelig-Jahr werde. Allerdings mit eme Wermuetstrompfe drin...

...mit dene Wort han ich min letschtjährige Jahresbericht beändet. Ja, leider isch alles andersch cho und us dem Tropfe isch e ganze Wasserfall vo Wermuet worde und das Vereinsjahr isch alles andere als freudig und beläbt use cho. Ich will jetzt nid die ganzi Corona-Gschicht ufrolle, mir kanned sie zur Genüge.

*Ich wett euch allne eifach **DANKE** säge für die paar schöne Momänt wo mir im 2020 zäme händ dörfe erläbe. Und für euches grosse Vertraue wo-n ihr mir als Chorleiteri all die Jahr entgäge bracht händ. Es isch e super Zyt gsy, hed Freud gmacht und mir dörfid au stolz sy, was mer alls uf d Bei gstellt und erreicht händ mitenand. D Galerie „Konzerte“ i eusere Homepage und die verschiedene Live-Üfnahme lönd die Erinnerige uf ene schöni Art wieder ufläbe.*

E ganz e bsundere DANK güt einisch meh Dir, Alfons, für Dyne unermüedliche Elan, dass euses Vereinsschiff au ohni Wind nid under gahd. Alli vo eus chönds chum erwarte, wieder i de Reihe z stah und zäme singe und jutze, fröhlich sy und Kameradschaft pfläge.

Ganz herzlich danke ich Dir, Alfons, au für Dyni sehr yfühlsame Gedanken, wo Du bi de Beerdigung vo mym Brüeder Wändel, im Name vom Heimelig, vortreid hesch und d Zäimestellig vo de CD für d Beerdigung. Das hed e sehr e würdige Rahme gäh und isch sehr gschätzt worde.

*Ganz bsunders und vo Herze begrüesse ich Dich, **Mirjam Walker**, als neui Chorleiteri. Ich bi überzeugt, mit Dir chund bestimmt mängs schöns, spannends und unerwartets musikalischs Erläbnis uf eus zue - mir freuid eus!*

I dem Sinn verabschiede ich mich als Dirigäntin vo euch und begrüesse euch als neus Chormitglied. Ich freue mich sehr, wyterhin z dörfe i de Reihe stah mit euch und hoffe natürlich, dass das möglichscht bald wird sy!

Euch allne wünsch ich vor allem eis: „Blybid gsund und bhaltid de Humor.“

Im Februar 2021, Euchi ehemalige Dirigäntin, Maria